

Transkription von Urkunde HAL 1351a

Ort, Datierung: Halle, 1351-09-21

Signatur: Stadtarchiv Halle, II, Urk., 35 U 1 Nr. 35 [\[online\]](#)

Inhalt: Otto, Erzbischof zu Magdeburg: Gutsurkunde

Bemerkung: Archivdatum. 1351-09-21

We Otto von der gnade goddis Ertzebischof des hilgen Goddeshuses tũ Meydebũrg be kenne
openliken / an disseme ieghenwerdigen briue , Dat we vnsen truwen vnde lieuen burgeren von halle
hebben redeliken / vor koft vnse Jodendorp tũ halle mid alleme rechte alsit vnses Goddeshuses ge
wesen is , vnde louen / on dar ouer tũ geuende vnsen br̃if mid vnseme vnde vnses Capitels ingesegelen
besegelt , twischen / hir vnde W̃ynachten d nu aller neest tũ komende is , Vnde dat disse ding vũl
toghen werden , so / hebben ge louet mit vns , vnde vor vns , die Edelen herren her Busse von
Scraplowe die eldere her Busse / sin sone die iungere , die Erbarn herren her henrich prouest tũ deme
Ñygen werke , her Henrich / prouest des Goddeshuses sente Mauriciuses tũ Halle , vnde her hans
schroye Riddere , Vnde en worden / disse vor gescreuene ding von vns nicht vũl toghen vor
W̃ynachten , so scolden disse vor ge namen / Borghen tũ Halle then in eyne Herberge vnde scolde dar
inlegher halden alse inleghers recht is , / vnde vd der stad nicht tũ komende , disse vor ge screuene
ding worden vũl toghen , oder sie en deden / dat mid der Ratman(n)e wille(n) , Were ouk , des god
nicht en wille , dat der ergenanten Borghen eyn / vnder der tyt aue ginge , so scole we eynen andern in
des stede in verteynachten weder setten , dar on / an ge ñoghe , Vp eyn openbar orkunde disser ding ,
dat die stede vnde gantz sunder brok ge halden w(er)de(n) / so hebbe we vor ge nante Otte
Ertzebischof , vnse ingesegil ge hengeset laten an dissen br̃if , Vnde we / Busse von Scraplowe die eldere
Busse sin sone die iungere Henrich prouest des Ñygen werkes bi Halle / Henrich prouest sente
Mauriciuses tũ Halle vnde Hans scroye riddere vor ge nanten beken(n)en dat we / vor vnsen herren
hern Otten vor ge screuene Ertzebischope hebben ge louet vnd louen an disseme ieghenwerdi=gen
briue alle disse ding alse vor ge screuen sin , stede vnde gantz tũ haldene , vnde tũ eyner openbaren / be
kentnisse disses ge l̃ouedes , hebbe weergenante(n) Borghen alle , vnse ingesegele ge hengeset an dissen
br̃if / Ge geuen na goddes gebort Druteynhundert Jar Jn deme enen vnde veftigisten Jare in sente
Matheus / daghe des hilgen apostelen /